

Dithero tsa Tirelano mo Kutlwanong

41/2014 Ka Sontaga 07 morago ga moletlo wa Modimo o o Borarobongwe, e le ka 03.
08. 2014

MO LEINENG LA MODIMO O E LENG RARA LE MORWA LE MOWA O O BOITSHEPO!

1. Sefela sa 5 - 5/5
2. **Thapelo:** Morena Modimo, Rara yo o rategang wa legodimo, re a kopa mo go wena gore o re itshepise mo boammaaruring jwa gago. Lefoko la gago ke la boammaaruri. Amen
3. Epistolo ka fa thulaganyong ya 2 e kwadilwe mo Ditirong tsa baapostolo 2:41a.42-47;

Efangele ka fa thulaganyong ya 1 e kwadilwe mo go Johane 6:1-15.
4. A go ipolelwe tumelo ya bokeresete!
5. Sefela sa 374- 346/353
6. Thapelo ya mmadi wa thero.
7. **Lefoko la thero** ka fa thulaganyong ya 6 le kwadilwe mo go Ekesodu 16:2-3.11-18, le re: "Ke fa morafe otlhe wa Baiseraele o ngongoregela Moše le Arone mo sekakeng. Baiseraele ba ba raya ba re: 'Ao! Bogolo re ka bo re swetse kwa lefatsheng la Egepeto ka seatla sa MORENA metlheng ele, fa re sa ntse re le fa dipitseng tsa dinama, re ja bogobe, re kgora. Jaanong lo re tsisitse kwano mo sekakeng se gore lo bolae morafe otlhe o ka tlala.' ... Mme MORENA a raya Moše a re: 'Ke utlwile dingongorego tsa Baiseraele. Ba ree o re: 'Maitsiboa lo tla ja nama, kamoso lo tla tsoga lo kgora bogobe. Lo tla lemoga jalo, fa ke le MORENA, Modimo wa lona.' Ya re maitsiboa ga tla maphurrwana, a tlatlala mo bothibelelong. Mo mosong monyo wa bo o koame mo tikologong ya bothibelelo. Ya re monyo o sena go phaphalala, ba fitlhela go tletsetletse fa fatshe go le dipapetlana jaaka kgokgotshwaane. Fa Baiseraele ba di bona, ba botsana ba re: 'Dilo tse ke eng?' Gonne ba ne ba sa di itse. Moše a ba araba a

re: 'Ke jona bogobe jo MORENA o bo lo nayang go nna dijo tsa lona. Jaanong se MORENA o se laolang ka ga tsona ke se: 'Di seleng, mongwe le mongwe ka fa a ka jang ka teng; e bong gomere e le nngwe ka fa palong ya batho ba lona. Mongwe le mongwe a selele ba lapa la gagwe.' Baiseraele ba dira jalo, mongwe a sela tse dintsi, yo mongwe go le gonnye. Mme ya re ba di lekanya ka gomere, ba fitlhela yo o phuthileng tse dintsi a se ka a fetisa selekanyo, le yo o sedileng go le gonnye a se ka a tlhaetsa. Mongwe le mongwe a sedile ka fa a ka kgorang ka teng." Amen.

8. Thero: Barategi mo Moreneng wa rona Jesu Keresete mo phuthegong e e gotlhe ya Modimo, kajeno batho ba ba sa ka keng ba balwa ba atamela mo selalelong sa Morena, fa ba Abelwa ka mafoko a a reng: Tsayang, lo jeng! Se ke mmele ruri wa Morena wa rona Jesu Keresete o o neetsweng mo losong. A o lo tiise, o lo boloke mo tumelong e e siameng, lo bolokelwe botshelong jo bo sa khutleng. Tsayang, lo nweng! Se ke madi ruri a Morena wa rona Jesu Keresete, a lo a tshologeletsweng go nna boitshwarelo jwa dibe. A a lo tiise, a lo boloke mo tumelong e e siameng, lo bolokelwe botshelong jo bo sa khutleng. Kgang ya lefoko la thero ya kajeno e re tswang go e utlwa ke sekao sa sejo se se boitshepo sa Morena. Kana Jesu Keresete o re abela tse dintsi tse di fetang tse di kileng tsa Abelwa Baiseraele ka nako ele ya bogologolo mo sekakeng sa Sine. Rona re a ijela, re a inwela botshelo jo bo sa khutleng mono mo selalelong sa Morena.

Baiseraele ba ne ba gololwa kwa Egepeto ka bopelotlhomogi jwa Modimo pele ga dibeke tse nne fela. Morago ga kgwedi e le nngwe fela ba ne ba setse ba lebetse gore e ne e le mang yo o neng a ba golola bo botlhankeng, mo toronkong ya kwa Egepeto. Fa re buisa kgang ya morafe wa Baiseraele, o ka re: Gantsi re utlwa ka ga dilelo, dingongorego, diphapogo, le dinyatso tsa bone, ba re: Re tlhoka se, re tlhoka tsele, re a tlhabela. Phuthego yotlhe ya bana ba Iseraele ba ne ba ngongoregela Moše le Arone mo sekakeng. Ba re: "Ao! Bogolo re ka bo re swetse kwa lefatsheng la Egepeto ka seatla sa MORENA metlheng ele, fa re sa ntse re le fa dipitseng tsa dinama, re ja bogobe, re kgora. Jaanong lo re tsisitse kwano mo sekakeng se gore lo bolae morafe otlhe o ka tlala."

Ke se se gakgamatsang, fa ba ne ba ngongorega jalo. Kana Modimo o ne wa ba tlhokomela, e seng ka fa ba tshwanetsweng ka teng, ga o a ba busetsa ka fa melatong

ya bona. Wa ba utlwela botlhoko, wa ba thusa, wa ba senolela kgalalelo ya ona. MORENA Modimo a bua le Moše, a mo raya a re: "Ke utlwile dingongorego tsa Baiseraele. Ba ree o re: 'Maitsiboa lo tla ja nama, kamoso lo tla tsoga lo kgora bogobe. Lo tla lemoga jalo, fa ke le MORENA, Modimo wa lona.' Ya re maitsiboa ga tla maphurrwana, a tlatlala mo bothibelelong. Mo mosong monyo wa bo o koame mo tikologong ya bothibelelo. Ya re monyo o sena go phaphalala, ba fitlhela go tletsetletse fa fatshe go le dipapetlana jaaka kgokgotshwaane. Fa Baiseraele ba di bona, ba botsana ba re: 'Dilo tse ke eng?' Gonne ba ne ba sa di itse. Moše a ba araba a re: 'Ke jona bogobe jo MORENA o bo lo nayang go nna dijo tsa lona.'"

Go ntse fela jalo kajeno. Modimo o re tlhomogela pelo, o re abela go feta tse re di kopang, le go di tlhaloganya. O re thusa ka thuso e e fetang e re e kopang, le go e tlhaloganya. Fa re budulola matlho a rona re tla bona kgalalelo ya ona mo botshelong jwa rona. Utlwang, lo bone gore Modimo o molemo. Motho o tshegofaditswe yo o tshabelang mo go ona. O tlabisetse ba ba bosula le ba ba molemo letsatsi la ona, o nesetsa basiami le basiamolodi pula. Mo botshelong jwa me ke setse ke bonye dikgakgamatso tsa Modimo, ka ithuta tlhaloso ya artikele ya 1 ya tumelo ya bokeresete e e reng: "Ke dumela gore Modimo o ntlhodile le dilo tsotlhe; o nneile mmele, mowa, matlho, ditsebe le ditokololo tsotlhe, tlhaloganyo le maikutlo otlhe, e bile o sa ntse o di boloka. Gape o nneile diaparo, ditlhako, dijo, dino, ntlo, lelapa, mosdi, bana, masimo, diruiwa, le dithoto tsotlhe. O ntlamela thata ka malatsi otlhe ka tsotlhe tse di batlegang mo botshelong jono, o ntshireletsa ruri mo ditlalelong tsotlhe, o bile o mphemela mo masuleng otlhe. Tsotlhe tseo o di ntirela fela ka ntlha ya bopelontle jwa gagwe le boutlwelobotlhoko jwa gagwe, ka e le Rre le Modimo wa me, nna ke se na tshiamo, le fa e le tshwanelo epe. Ke ka moo ke tshwanetseng go mo leboga, le go mo tumisa, le go mo direla, le go mo utlwa. Tseo ke nnete ruri."

Ke a itse, le go dumela gore Modimo o a ntshikara, o a mpoloka ka metlha ka bopelotlhomogi jwa ona, jaaka o ne wa boloka, le go tlamela morafe wa ona mo sekakeng. Fela jalo o mphelegetsa ka dineo tsa ona. Ditshofofetso tsa ona di eme. Lefoko la ona le teng, le tlhomame, le feta thata bokoa jwa rona. Le fa ditlalelo tsa rona e le tse dikgolo, bopelotlhomogi jwa ona bo bogolo go feta tsona, o mogolo go feta dipelo tse dinnye tsa rona. Lefoko la ona le boitshepo, le legolo go feta khutsafalo

yotlhe ya rona, le legolo go feta loso lwa rona, le maleo a rona, le Satane, le legolo go feta tsotlhe tse di re tshwenyang mo lefatsheng leno la ditlalelo.

Jesu Keresete ke yo! Mopholosi wa rona o a re laletsa, a re: "Tlaang kwano go nna lotlhe ba lo lapileng, ba lo imelwang, nna ke tla lo lapolosa!" "Ammaaruri, ammaaruri, ke lo raya ke re: "Ga se Moše yo o lo fileng senkgwe se se tswang kwa legodimong, ke Rre yo o lo fang senkgwe sa nnete se se tswang kwa legodimong. Gonne senkgwe sa Modimo ke sona se se fologang kwa legodimong, se se nayang lefatshe botshelo. Ba mo raya ba re: 'Morena, re fe senkgwe seo ka metlha ytolhe.' Jesu a ba raya a re: 'Ke nna senkgwe sa botshelo, yo o tlang go nna ga a ka ke a tlhola a utlwa tlala. Yo o dumelang mo go nna ga a ka ke a tlhola a nyorwa.'" Ke ona mfago mo tseleng e e yang mo legodimong. Modimo o rata gore re tshale mo lefatsheng leno le mo go le le tlang. Lorato lwa ona lo re bolokela mmele le mowa. Ka ntlha ya moo fa re sa lape, mme le fa mmele wa rona o o ka fa ntle o ka nyelela, o mo teng ga yo o dirilweng sešwa mo kolobetsong. A go lebogwe leina la gagwe le le boitshepo! Amen.

9. Thapelo: Morena Modimo, Rara wa legodimo, re a leboga. Re lebogela lorato lwa gago, le bopelotlhomogi jwa gago jo re bolokileng ka jona ka metlha. O ntse o re tlamela thata ka tse di molemo tse re di tlhokang, le tse re tshelang ka tsona. O tshegofatse dineo tse re di amogelang ka letsatsi le letsatsi ka bopelonolo jwa gago ka ene Jesu Keresete, Morena le Mopholosi wa rona. Amen. Thapelo ya Morena: Rara wa rona yo o mo legodimong ...

10. Sefela sa 376 - 348/355

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke K. G. Tiedemann ka ngwaga wa 2014

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.